



MARILAH kita meningkatkan ketakwaan kita kepada Allah Subhanahu Wata'ala dengan penuh keyakinan dan keikhlasan dengan melakukan segala suruhan-Nya dan meninggalkan segala larangan-Nya. Mudah-mudahan kita menjadi insan yang beriman dan bertakwa serta selamat di dunia dan selamat di akhirat.

Pada tahun ini kita menyambut Ulang Tahun Hari Kebangsaan Negara Brunei Darussalam yang Ke-33, iaitu pada hari Khamis, 26 Jamadilawal 1438 Hijrah bersamaan 23 Februari 2017 Masihi. Selaku rakyat dan penduduk negara ini, kita patut

Menjayakan Wawasan Negara

bersyukur ke hadrat Allah Subhanahu Wata'ala kerana mengurniakan nikmat keamanan, kesejahteraan dan kemakmuran. Semua ini adalah berkat kita berpegang teguh dengan ajaran agama Islam, iaitu mengerjakan apa yang disuruh-Nya dan meninggalkan apa yang dilarang-Nya, di samping hidup bersatu padu tanpa mengira bangsa dan agama. Firman Allah Subhanahu Wata'ala dalam Surah Ali 'Imraan, ayat 103 :

Tafsirnya : "Dan berpegang teguhlah kamu dengan tali (agama) Allah, dan janganlah kamu bercerai-berai dan ingatlah nikmat Allah kepada kamu ketika kamu bermusuhan-musuhan (semasa jahiliah dahulu), lalu Allah menyatukan antara hati kamu dengan nikmat agama Islam, maka menjadilah kamu dengan nikmatnya itu (orang-orang Islam) yang bersaudara."

Alhamdulillah, kita bersyukur kerana Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam selaku pemimpin negara menjunjung tinggi ajaran Islam dalam pemerintahannya dan menjadikan Melayu Islam Beraja sebagai falsafah negara, sebagaimana titah baginda dalam Perintah Kemerdekaan Negara Brunei Darussalam pada 1 Januari 1984, 33 tahun yang lalu. Antara petikan titah baginda itu ialah : "Demikian juga Islam ialah agama yang menjamin seluruh kepentingan rakyat dan penduduk dengan tidak mengira apa jua agama, suku kaum dan keturunan. Pendek kata agama Islam adalah jaminan keselamatan dan kesejahteraan untuk semua. Kerana itu tidak siapa perlu takut dan ragu mengenainya."

Sesungguhnya ini adalah satu keistimewaan negara kita yang menghidupkan semangat kebangsaan, ketaatan kepada raja dan menjunjung tinggi agama Islam dengan

penuh iltizam serta menerajui Wawasan Negara 2035. Oleh itu, selaku rakyat mestilah membuka minda untuk memperkukuhkan wawasan tersebut.

Sebagaimana yang kita maklum, tema sambutan Hari Kebangsaan pada tahun ini ialah "Menjayakan Wawasan Negara". Sesungguhnya Wawasan Negara 2035 adalah gagasan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam. Pandangan baginda yang jauh ke hadapan memastikan Negara Brunei Darussalam menjadi sebuah Negara yang mempunyai rakyat yang berpendidikan, berkemahiran dan berjaya, kehidupan yang berkualiti, ekonomi yang dinamik dan berdaya tahan. Ke arah mencapai wawasan tersebut, kita perlu bersatu untuk taat setia kepada raja dan negara, yakin pada nilai-nilai agama Islam, mengamalkan nilai-nilai mulia dan sifat terbaik-baik sesama bangsa, agama dan negara. Firman Allah Subhanahu Wata'ala Surah An Nisaa, ayat 59 :

Tafsirnya : "Wahai orang-orang yang beriman! Taatlah kamu kepada Allah dan taatlah kamu kepada Rasulallah dan kepada Ulil Amri (orang-orang yang berkuasa) daripada kalangan kamu."

Justeru, dalam memastikan Wawasan Brunei 2035 dapat dicapai dengan jayanya, setiap rakyat dan penduduk Negara Brunei Darussalam perlu mengambil peranan dan menjadikan diri mereka sebagai aset yang berguna dalam pembangunan negara.

Ke arah mencapai Wawasan 2035, amatlah penting bagi rakyat dan penduduk negara ini untuk melengkapkan diri dengan ilmu dan kemahiran, menyediakan diri dalam pembangunan negara, serta meningkatkan daya saing, berinovatif, kreatif, membangun ekonomi, politik, sosio-budaya, keselamatan dan sebagainya.

Firman Allah Subhanahu Wata'ala dalam Surah Az Zumar, ayat 9 :

Tafsirnya : "Katakanlah: adakah sama orang-orang yang mengetahui dengan orang-orang yang tidak mengetahui? Sesungguhnya orang-orang yang mengambil pengajaran hanyalah orang-orang yang mempunyai akal yang dapat memikir dan memahami."

Sesungguhnya untuk mencapai kejayaan dan survival bangsa dan negara, rakyat dan penduduk di negara ini perlu bersatu padu sama ada sektor kerajaan mahupun swasta bersama-sama meningkatkan usaha dalam pembangunan negara bagi mencapai matlamat Wawasan 2035. Oleh itu, bersempena dengan Sambutan Ulang Tahun Hari Kebangsaan Negara Brunei Darussalam yang Ke-33 ini sama-samalah kita menzahirkan rasa syukur atas keamanan dan kemakmuran yang kita nikmati pada masa ini, dengan beramai-ramai hadir ke masjid-masjid, surau-surau dan balai-balai ibadat seluruh negara, iaitu pada petang Rabu, 25 Jamadil Awal 1438 Hijrah bersamaan dengan 22 Februari 2017 masihi bagi sama-sama Bersembahyang Maghrib Berjemaah, membaca Surah Yaa Siin dan Doa Kesyukuran dengan tumpuan utama di masjid Omar 'Ali Saifuddin, Bandar Seri Begawan.

Mudah-mudahan dengan yang demikian negara kita tetap kekal menjadi sebuah negara yang merdeka lagi berdaulat dan menjadi "Baladun Tayyibatun Warabbun Ghafur", iaitu negara yang aman makmur dan Tuhan Yang Maha Pengampun.

Surah Yusuf, ayat 76 :

Tafsirnya : "Kami tinggikan pangkat kedudukan sesiapa yang kami kehendaki dan tiap-tiap orang yang berilmu pengetahuan ada lagi di atas yang lebih mengetahui."

Tanam rasa cinta pada tanah air

Oleh : Dk. Siti Redzaimi Pg. Haji Ahmad

Foto : Dk. Nur Hafilah Pg. Osman

TUNGKU LINK, Khamis, 16 Februari. - Universiti Brunei Darussalam (UBD) sekali lagi mengadakan Majlis Menaikkan Bendera Kebangsaan sempena Sambutan Ulang Tahun Hari Kebangsaan Negara Brunei Darussalam Ke-33 bagi Tahun 2017.

Majlis diadakan di hadapan Bangunan Perpustakaan UBD, di sini dan dihadiri oleh Pemangku Naib Canselor, Dr. Teo Siew Yean selaku tetamu kehormat, pegawai-pegawai utama, kakitangan dan pelajar-pelajar UBD.

Acara dimulakan dengan perbarisan lalu oleh Platun Kadet Tentera UBD yang membawa bendera-bendera negara dan diikuti

dengan bacaan doa.

Majlis diteruskan dengan penyerahan bendera negara oleh tetamu kehormat kepada Ahli-ahli Platun Kadet Tentera UBD bagi acara penaikan bendera.

Penaikan bendera diiringi dengan nyanyian beramai lagu kebangsaan dan diikuti dengan nyanyian lagu patriotik 'Berkibarlah Bendera' yang diketuai oleh Ahli-ahli Majlis Perwakilan Pelajar UBD.

Acara tahunan ini diungkayahkan oleh Hal Ehwal Pelajar UBD, dengan tujuan untuk menanamkan rasa cinta pada tanah air khususnya Negara Brunei Darussalam dan memupuk semangat patriotisme dalam kalangan

pelajar-pelajar UBD.

Ia juga adalah untuk mendukung hasrat murni dan wawasan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dalam Wawasan Brunei 2035 dan untuk menjadikan Negara Brunei Darussalam sebuah Negara Zikir berasaskan falsafah Melayu Islam Beraja dan Baladun Tayyibatun Warabbun Ghafur, selaras dengan tema Hari Kebangsaan pada tahun ini, iaitu 'Menjayakan Wawasan Negara'.

PEMANGKU Naib Canselor, Dr. Teo Siew Yean selaku tetamu kehormat menyerahkan bendera kepada Ahli Platun Kadet Tentera UBD bagi acara penaikan bendera.



UNISSA naikkan bendera kebangsaan

Siaran Akhbar dan Foto : Universiti Islam Sultan Sharif Ali

BANDAR SERI BEGAWAN, Khamis, 16 Februari. - Sempena Sambutan Perayaan Ulang Tahun Hari Kebangsaan Negara Brunei Darussalam Ke-33, Tahun 2017, Universiti Islam Sultan Sharif Ali (UNISSA) telah mengadakan Upacara Menaikkan Bendera Kebangsaan di kawasan letak kereta universiti

berkenaan di Gadong.

Pemangku Rektor UNISSA, Dr. Awang Haji Mohammed Hussain bin Pehin Penyurat Haji Ahmad hadir selaku tetamu kehormat pada upacara tersebut juga turut dihadiri oleh warga UNISSA lainnya.

Menurut Siaran Akhbar UNISSA, majlis dimulakan dengan bacaan Surah Al-Fatihah dan diteruskan dengan penyerahan bendera kebangsaan oleh tetamu kehormat kepada Kadet Tentera UNISSA.

Kemudian bendera dinaikkan diiringi oleh lagu kebangsaan, 'Allah Peliharakan Sultan'.

Doa Selamat dibacakan oleh Awang Mohammad Rifat Atiyah bin Anwari dari Majlis Perwakilan Pelajar (MPP) UNISSA.

PEMANGKU Rektor UNISSA, Dr. Awang Haji Mohammed Hussain bin Pehin Penyurat Haji Ahmad hadir selaku tetamu kehormat menyerahkan bendera kebangsaan kepada Kadet Tentera UNISSA.

